



耳溪集
四

詩

共二十二

~ 16
2330
4



2330
2/4

耳溪集卷八目



詩

閒居錄

小弟鳴漢中進士榮墓志感

哭仲弟挺漢墓

翼翼齋夜集謹次族兄相公

鳳漢韻

又次昏字

二首

又得香字呈翼翼齋乞和

又次眉字

長夏幽居

夏睡

臨漢亭

鄭令公聖從

純儉

索詩寄呈一律

簡寄清道倅李季真

章祐

兼求詩箋

暮春同李汝慎

徽中

及諸友賞花于

貞陵二首

扈駕

獻陵謹構四韻以伸頌忱之忱

回鑾時有從官落後之命與諸公泛鷗湖

疊前韻呈江漢居士黃大卿

景源

涉園

金友渾然有約不來悵然而題

寄渾然

水曹官銜偶同昔賢聊賦自喜之意

李相國

昌誼

清郊別墅次壁上韻

秋聲

贈連原丞蔡景洪希範

送上价徐尚書君受赴燕

三首

寄李正言潤甫三山僑居

五首

送朴僉樞敬行之任興海

除日差祭 長陵守歲齋室

端陽日差祭 貞陵憶曩歲詩會悵然而題

讀始皇紀

翼齋回甲謹次老圃趙尚書

明鼎韻

登俊試紀事八絕

榮掃志感

次趙侍郎元玉

宗鉉

日涉亭韻

奉贐李令公善之

性源

之任淮陽

送洪校理

相聖

充試才御史赴濟州

四首

送李學士聖中

在學

從事北關

四首

奉贐李令公德而

崇祐

之任春川

三首

將之慶興歷入耳溪哭別子墓

五首

送副价鄭侍郎大哉

元始

赴燕

送李侍郎聖浩

敬養

按海西伯

二首

贈李郎永翼

二首

燕行初返入驪湖題元亨溪亭

追題族大父判書公

重徵

致仕帖

敬和鶴城君

榆

賜几杖日

御製詩韻

奉酬萬妙子權聖一

萬衡

寄示韻

憶鄭侍郎時晦

景淳

寄呈白川行軒

宋德文

載道

寄古體四韻詩足成十二韻酬之

留題雙湖亭

送申水部文初之任麟蹄

別小瀛居士洪聖幾 秉喆 大歸東江

奉酬萬妙子權聖一贈白羽

敬次宗兄靖惠公 象漢 宣謚日 御製詩韻 二首

一門三者近世罕有各設一會以志盛事 二首

步月禁川橋

觀鷄啄粟鵝吃草

觀鳥啄木

夜聽楊少尹序感二疏事

寄紀尙書

宣德硯歌

玉如意歌

敬和宗姪領相 樂性 賜几杖宴 御製詩韻

曉嵐宗伯寄詩遠訊步其韻答之 二首

寄曉嵐紀尙書 二首

送族叔奉賀 秀輔 就養兒觀察關東太太府

送曹學士錫中以書狀赴燕 三首

送奏請副使李侍郎 集斗 赴燕

月夜有懷鄭時晦

病中夢得領聯有感而足成

奉賀洪知敦寧

應辰

進士回榜

送正使曹尚書

九大

赴燕

夢中贈客

夢題畫鷹

耳溪錄

中秋夜登後麓

舍弟自貞陵齋所來會遊萬景洞

二一首

秋聲

山行漫題

暮春出耳溪途吟

滿山桃李盛開題兼山樓

卽事

登紗帽峰遠眺

二一首

夜聽小瀑無寐漫題

落花吟

二一首

樓前小溪築石成橋

受服省湖阡轉向耳溪

暮春少望同子姪及六七少年遊九曲潭

漫題

見石上舊書戲題

出耳溪

登兼山樓見倭紅盛開

病後出耳溪登水哉亭

有二少年聯轡來訪喜而題贈

出耳溪聞樊川父子來遊留詩步韻却寄 二首

少望季常熙叟來訪携入九曲潭

樊川父子歸賦五七律見贈和以謝之 四首

暮春出耳溪

將歸留題

耳溪集卷八

詩

閒居錄

小弟鳴漢中進士榮墓志感 癸未

松柏荒原淚星霜十七朞小哥成進士餘慶及孤兒

共把青衫泣那將彩服嬉悠悠不洎痛逢喜每成悲

哭仲弟挺漢墓

吾家兄弟白眉誰英妙登庠仲最奇夢澤天寒驚斷

影池塘春盡廢新詩三哥鴈塔題名日六載鴿原失

侶悲寂寞深山埋俊骨數聲啼鳥夕陽遲



翼翼齋夜集謹次族兄相公鳳漢韻

高樓華燭喚佳人羅袂飄然雪白辰杜曲黃娘傳舊
譜喬家碧玉是前身携來短瑟陽關月落盡寒梅漢
水春欲說平生多少恨浪江烟柳幾番新箕城妓黃玉適至歌以侑歡故兩聯云

又次昏字二一首

高柳沙堤雪意昏疎鍾微月客敲門燈前眉睫溫溫
色歲暮心期款款言花樹團欒兄及弟詩書清白祖
傳孫百年種德風猷遠袁氏朱輪儼一村
人情冷暖變朝昏世路偏陂劇孟門問喘直須存大

體烹鮮元不在多言數莖白髮緣憂國一片青氈可
庇孫宿債塵間何日了角巾東出水雲村

又得香字呈翼齋乞和

黃扉多暇樂時康東閣留人趁月光槐影滿庭花樹
映梅鬚拂几鼎茵香爐薰煖似三春氣詩令嚴於五
夜霜却愧惠連思更拙真成籍湜走還僵

又次眉字

梅下逢迎展笑眉詩壇月夕鎮相隨青蓮敏捷人無
敵黃絹才思我較遲不必文章論巧拙須看勲業佩
安危疎慵猥托忘年契何異蒹葭倚玉枝

長夏幽居 丙戌

遶屋花無數盈庭草欲齊
閉門知日永高枕見山低
睡罷雲猶在詩成鳥復啼
仙源非別界城市亦幽棲

夏睡

白雲下簷際幽興一何長
散帙收朝雨橫琴帶夕陽
孤松依石丈羣蝶護花王
靜坐留爽氣炎天也自涼

臨漢亭

終南山下大江流高閣平
臨鏡面浮雨歇汀烟生
席上日斜帆影在欄頭
青槐故宅傳清福白舫
新秋敞勝遊他日角巾
携手約一竿明月有輕鷗

鄭令公聖從 純儉 索詩寄呈一律

鄭公鬢如絲樗散古來悲
薄宦餘奇氣高才老盛時
雪中無宿爨梅下有新詩
莫歎知音寡須將百世期

簡寄清道守李季真 章祐 兼求詩箋 丁亥

雲水蒼茫嶺路賒相思中夜一
高歌少時故舊惟君
在千里分離奈老何紫閣秋深
霜菊晚滄江木落暮
山多非無尺素憑歸鴈猶待
溪藤拭嫩鵝

暮春既望同李汝慎 微中 李穉和 致中 李善之

性源 賞花子 貞陵汝慎之胤 義鳳 時為寢郎

也李潤甫 重海 亦不期而會拈韻共賦 二一首

層城疊嶂碧峩立馬山蹊細雨過行度小橋芳草
遍坐聽流水落花多佳朋繞席皆青眼旨酒盈樽自
綠波白首風流還不淺陽春一曲為君歌

長歌短嘯過前川盡日山崖與水邊返照入林紅勝
錦光風轉蕙綠如烟直須痛飲酬佳節爭奈韶光異
去年醉出洞門却回首落花啼鳥共依然

暮春 上幸 獻陵御龍舟渡廣津 鶴駕從

焉舳艫旌旗連江蔽空士女耄倪漫山溢野誠
希曠之宏觀也謹構短律以伸頌拊之忱 戊子

金門曉闢鼓鼙鼙仙仗春移瑞氣濃燈燭薰天人似

海風雲繞座舟如龍花邊劒佩千官擁日下戈旌萬
騎從更觀前星隨北斗謳歌八域頌重重

回鑾時有從官落後之命與諸公泛鷗湖

車駕詣 獻陵翌日回鑾陪到廣津有從官

落後之命遂與黃台大卿 景源 族兄君平 名

漢 鄭令希天諸公拏舟順流而下水行數十
里過蘆島泛鷗湖泊二水浦登陸入城是行
也舍鞍馬之勞而就舟楫之安當鞅掌之時
而卜清曠之遊誠一奇事不可無識黃台唱
詩令得舟字共賦之

東溪集 卷八
喬陵隨彩仗清漢泛輕舟水拍羣山動天涵萬象浮
鷗邊花滿岸帆外草連洲不有君恩借那成此日
遊

疊前韻呈江漢居士黃大卿

半醉巴陵酒同登元禮舟文章江漢大軒冕水雲浮
短棹搖晴日高歌下晚洲身邊猶劔佩相笑詫奇遊

涉園

病起春將盡扶筇憩小園落花侵短鬢啼鳥近清樽
把卷仍成睡看碁忽忘言閒中無限趣悄坐與誰論
金友渾然有約不來悵然而題

十年多病已成翁觀物方知靜有功終日閉門春寂
寂落花滿地雨濛濛莫嗟鏡裏顏非昔猶喜樽中酒
不空悵悵故人違好約華燈霽月與誰同

寄渾然

老去愁來誰與寬清樽佳節強成歡春光不到鬢邊
雪酒力能回鏡裏丹百歲平分嗟已半四時推轉苦
無端故人臥病空相憶微月殘花獨倚欄

水曹官衙偶同昔賢聊賦自喜之意

遲暮功名似杜何清衙堪愧亦堪誇班行獨占三曹
下公事時開五日衙強策病軀趨粉署羞將華髮戴

烏紗詩情不與官俱冷花鳥春來自滿家

李相國

昌誼

清郊別墅次壁上韻

己丑

草綠沙堤野麥黃閒花飛繞鼎茵香當簾秀色青山
聳隱几幽情白日長廊廟林泉公自得江湖魚鳥我
相忘慙慙小酒停歸轄回首西峰暝更蒼

秋聲

寂歷寒齋夜林間葉葉風秋聲非在樹天籟自生空
蕭瑟從何處悲涼聽未窮更添無限恨雲外叫孤鴻
贈連原丞蔡景洪希範

名閎柯亭舊詞源挹遠瀾高才憐短髮傲骨寄微官

識字身何補知音古所難中原多鼓吹文彩照江干

鄭時晦方為忠牧與之唱酬云故尾句中中原即忠州別號

送上价徐尚書君受赴燕

三首

送客西天氣沈濶離亭紅葉下蕭蕭三韓學士今華
髮十載如何再度遼
積雪峨峨大小凌行人萬里去餐冰胃中知有先天
易試聽潛雷地底騰
旄頭一點久韜輝故老相傳入紫微縱好居停終是
客百年何事不思歸

寄李正言潤甫三山僑居

五首

北陌南溪互往還岸楓籬菊與開顏秋風一別雲山
隔叢桂幽香夢裏攀

人言潤甫是奇男酒後昂然抵掌談獨我憐渠文史
外眉間松翠與山嵐

前年琴鶴臥洪州每喜輕舟海上遊潮落三山明月
夜數聲漁笛在中流

男兒拙宦豈謀生長往元非薄世情床有尺琴家四
壁洞龍應和讀書聲

歲暮悲歌不自聊憶君滄海路迢迢故人獨臥三冬
雪詩社風流久寂寥

送朴僉樞敬行之任興海

徐羅樂府有追蠡萬萬波波玉笛奇千載孤雲留製
作待君應復續新詞

徐羅卽新羅古號羅時得玉笛於東海吹之則風波自息故號曰萬萬波波息笛崔孤雲作詞曲傳世

除日差祭 長陵守歲齋室 辛卯

孤樽殘臘夜依依風雪山齋燭影微陶令初歸方覺
是蘧公將老始知非海西雲隔三刀夢江上春回一
釣磯歲色堂堂今半百白頭怊悵寸心違

端陽日差祭 貞陵憶曩歲詩會悵然而題
五載東溪再渡時風流尙憶醉淋漓蒼巖水齧題詩

墨綠樹陰濃繫馬枝舊伴即今星落落孤齋獨臥日
遲遲看花跂石還悵悵惟有林鶯勸小卮

讀始皇紀

焚籍銷兵計不疎阿房萬世擬皇居未收澤畔斬蛇
劍却漏橋邊墮履書童女不來止王處癡兒已長備
胡餘三十十古以平聲使六郡瓜分地未儻孫嬰一燹廬

翼齋回甲謹次老圃趙尚書明鼎韻 癸巳

夷險從容素履同江湖閒臥六旬翁人間五福兼并
際天下三尊退讓中軒冕爾來輕土芥神仙何必在
瀛蓬始知 聖主陶勻化成就吾宗百世風

登俊試紀事八絕 甲午

臨軒登俊起何年昭代彬彬盛事傳三百九年今再
舉星文應復動奎躔

春王正月上元晨舊闕天臨瑞日新金玉盈庭皆握
管依然獻賦明光辰

天門唱榜映彤霞金帶緋袍次第加頭上無端生桂
樹廿三年內再開花

仙官傳命喚新來三十三人上殿催左龍右虎分前
隊玉輦葳蕤率榜迴

風雲繚繞景賢堂湛露華筵法醞香十字奎章衣一

襲人人遍體被龍光

九霄仙漏下丹梯蓮燭分光路不迷天街月色明如
畫寶馬雙翻碧玉蹄

翼朝齊進謝恩箋川字紅牌儼導前簪花亦有乘軒
者堪笑都人望若仙

圖畫麟臺本紀功丹青何事又南宮賁飾太平知
聖意疎才無計答熙隆

榮掃志感

悲歡卅載過中身稀世榮光忝俊臣殊寵再簪頭上
桂虛名今作畫中人蓬科草綠清明過梓里春回雨

露新詩禮傳家餘慶是每叨恩渥益沾巾

次趙侍郎元玉

宗鉉

日涉亭韻

君家江榭竹為欄縹緲凌虛面勢寬鴨島帆檣搖檻
過冠山烟霧隔簾看憑軒落筆金鱗躍臨水彈碁玉
子寒何日扁舟乘興出芳樽皓月躡清歡

奉贐李令公善之

性源

之任淮陽

自笑塵埃未拂衣仙丘夢想每依依送君萬二千峰
裏知我四十九歲非墨綬晴搖紅樹去鳴騶曉入白
雲飛衆香城上如相待躑躅開時庶莫違

送洪校理

相聖

充試才御史赴濟州

四首

八月仙槎不可攀長風直指漢孛山此行况值秋分
後南極老人正好看

晴見蘇州點點烟越商來泊採珠船爭言好涉三韓
界東海無波五十年

耽羅子弟解通經文彩頗能洗海腥聖代不曾疎結
網明珠幾箇渡滄溟

笙歌時向橘林天驚破壺中千日眠洪崖消息如相
問今作人間白髮仙

送李學士聖中

在學從事北關四首

八百健兒騎紫騮腰橫金僕戴銀盞清秋擊獸長榆

去白面書生居上頭

分水嶺頭一片碑何人於此界華夷無端割與膏腴

地千里縱橫獵騎馳

五國孤城瑟海邊塞鴻飛斷起寒烟山鳥夜啼侍臣

塚野人時拾宣和錢

邊門互市百年餘弱國交隣計不疎一帶豆江超可

越興京消息問何如

奉贐李令公德而

崇祐乙未 之任春川 三首

複峽綦綦古貊墟故人腰下垂銅魚山氓久染文明

化板壁松燈盡讀書

昭陽江水綠如烟上有高樓樓上仙手閱黃庭衣鶴
擎門前時泊採蓼船

燁燁紫芝山上多送君仍作紫芝歌一年三秀芳堪
採欲往從之奈病何

將之慶興歷入耳溪哭別子墓 五首 丁酉

自汝之亡矣青山草再黃嚴霜覆汝面悲風裂我腸
腸裂不足惜何處見清揚日月空去去天地竟茫茫
汝兒已能言但呼母與祖汝兒始學字不忍教以父
稍長若有問將以何語譬兒音漸似父我心慰不慰
我築溪上屋汝墓在其右昔汝從我來勸我起小構

屋成汝不在老我獨來居汝心想有依我懷當何如
我祖三千里迢迢青海傍汝弟皆來送鄉里亦遠將
把酒不能飲四座慙無言上山欲一慟更恐戚汝魂
汝少喜為詩汝又工於寫凡我有述作使汝書且和
自汝之亡矣不忍更吟詩今作別汝辭為我寫者誰

送副价鄭侍郎大哉 元始 赴燕 庚子

吾弟前月自燕山之子今日向龍灣一年冠盖再度
遼胡為屑屑不憚勞密邇強鄰禮有加弱國皮幣堪
咨嗟况復炎天涉凌河車輪沒泥將奈何皇帝今年
滿七旬六龍駉駉南出巡金陵石頭二千里寒往暑

來庭戶視武帝明皇所未會尚能騎馬如鷹騰八月
十三千秋節萬國會同旅庭實勢面毳服何詭異侏
僑任昧紛聒耳端委長裾獨我人鵠立班行羣笑顰
君之先祖北窓翁嘉靖年間觀皇風三晝獨立九街
中四夷方音皆默通當時見者嘆異人至今風聲應
未湮嗚呼今之中華非昔日文物謠俗更誰質若逢
遺民無多言但道我是北窓孫

送李侍郎聖浩

敬養

按海西伯

二首 辛丑

不既天官貴爭如刺史榮職雄分一面恩重養專城
報國無他術傳家只箇清疎才會素食還愧贈君行

碧城何處好清絕一荷堂鶴對轅門靜花添畫戟香
歌聲樓上下舞影水中央十載渾如夢送君思更長

贈李郎永翼

二首

回首西遊十一年碧城山色夢依然池花院鶴應無
恙老我如今雪滿顛

送君重渡碧瀾清却憶當時玉貌迎甥館卽今還子
舍侍童應慣讀書聲

燕行初返入驪湖題元亨溪亭

癸卯

江田漠漠長新蒲倚杖沙頭見浴鳧萬里奇遊臨碣
石十年閒夢在驪湖歐陽未老猶思穎張翰逢秋卽

返吳破屋數間如苟合一竿終伴舊漁徒

追題族大父判書公重徵致仕帖

雲漢榮光動袖間手擎華誥伴韶顏九疇齒德元難
並兩世行藏若是班洛社琴樽添氣色韋園花樹倍
清閒都門供帳知多少天末空瞻倦鳥還

鶴城君楡以先朝同庚甲戌生今年為九十

一上於九月十三日先朝誕辰特賜几杖

下御製七律諸臣敬和之甲辰

南極星官有老人璿潢今作謫來身百年未滿三千
日一葉先添九十春景運懸弧曾並甲端門帶劍又

回辰輝煌杖几紆天寵從古斯榮更孰倫鶴城於先朝甲辰

登極日以摠管侍衛今年回甲臨門朝參時又帶摠管入侍故承此恩教

奉酬萬妙子權聖一萬衡寄示韻乙巳

昔我弱冠治文辭君以妙齡來追隨名驥步驟自出
羣昂昂已有籟雲姿霜蹄將看騁高衢世事謬悠不
可期我今白首困塵縉君向東湖理釣絲中間聚散
數十年對酒看花時夢思去歲洛下一相訪握手歡
如少年時蕭然對坐兩衰翁玄首翻驚素髮垂昔日
朋遊餘幾人臨別慙慙把深卮今年尺素自馳峰投
我墨卿百韻詩湖堂學士對壁壘詞鋒筆花光陸離

老夫氣恟無餘勇却立三舍觀鼓旗秋風一夕動郊
墟疋驢言歸東溪湄天冠之峰濯纓臺清流九曲恣
所之山扉寂寂掩雲松惟有樵童來看碁此中安得
故人來絕頂邃壑窮探奇岸楓欲丹山菊黃芒鞋竹
杖莫遲遲

憶鄭侍郎時晦

景淳

寄呈白川行軒

一別秋風歲又更故人高臥水雲清專城養侈銀川
守晉秩恩隆水部卿多病元來非傲世休官何事反
媒榮自憐白首無歸日空向天邊聽鴈聲

芝溪宋德文

載道

寄古體四韻詩仍足成十二

韻以訓之

渺渺千載下遊心在太初古人餘糟粕得意便忘書
知音誠難遇與世自相疎誰歟歌紫芝賁然來我居
小瀛有高士翩翩共連裾庭列丈人石門無顯者車
牙籤插盈架偃仰其中於何以娛嘉賓村醪擷園蔬
談理劈絲毫辨物及蟲魚彈琴按流水音調有疾徐
仍翻步虛曲山雲卷復舒終日憺忘歸吾道竟何如

留題雙湖亭

庚戌

塵埃奔走十年餘疋馬西湖伴老漁滿江烟雨披蓑
立誰道天官舊判書

送申水部文初之任麟蹄

琴鶴何須問米鹽文章山水苦難兼官從水部清如
杜地近雪山重自嚴楓嶽葉紅應騁目寒溪月白好
掀髯獨憐老我違同社梅下深杯誰與添

別小瀛居士洪聖幾 秉喆 大歸東江

悽悽復惻惻之子去何之 起句用子美贈太白之語 幻界諸緣斷
浮家隻影隨風松空自韻霜菊遂無詩不盡青霞氣
千金善護持

奉酬萬妙子權聖一贈白羽

故人遙隔蟾江湄歲暮閒居有所思忽然白羽落我

前伴以尺素帶新詩其羽翯翯如雪白故人相贈一
何奇疑是閩苑縞衣仙千年一蛻餘半規使我一掃
塵俗累翛然獨立絕染緇清風明月好相携綠水青
山無不宜我思古人誰先獲隆中處士曾手持一麾
三軍聽號令宰割荆益隨指揮顧我白首無他念卷
舒用捨惟適時雲霄萬古仰彌高微斯人吾誰與歸
敬次宗兄靖惠公 象漢 宣謚日 御製詩韻 二首
九天華誥帶彤霞秋日槐陰滿故家雲漢昭回隨法
樂榮光特地錦生花

厥初種德履艱時恭儉傳家以得之奕世公卿膺節

惠振振餘慶子孫宜

一門三者社

族叔奉朝賀秀輔氏
宗姪領議政樂性

近世罕有時

值癸丑暮春做蘭亭修稷三家各設一會以志

壽域盛事

癸丑

明時者壽萃吾門三世聯登齒爵尊希代光榮靈閣
牒傳家清慎慕堂孫昇平共際風雲會陶鑄均涵雨
露恩韋曲如今成洛社床前袍笏映花樽
分日池臺敞壽筵疎才堪媿厠高年良辰癸丑三春
是盛事香山九老傳鶴髮爭看斟大斗燕毛聊喜奏
清絃洪恩聖代將何報願把羣齡獻日邊

正月十二日

上詣

顯隆園命賤臣為守宮

大將巡徼禁中至十五日還宮乃罷歸每夜步

月禁川橋詩以識之

甲寅

六飛星駕向

仙園仗節周廬警曉曛紫籙重看上

元月金門還有大將軍虹橋踏影連三夜虬箭傳聲

自五雲劒佩成行迎玉輅禁城佳氣倍氤氳

觀鷄啄粟鵝吃草

物生天地間有口皆求食鳥鼠啄蟲蟻鷄鶩爭豆粟
鷗鷺好攫魚虎狼恣擇肉貪或甘臭腐潔或嚼土木
受氣紛不齊奚論美與惡斯人稟靈粹四海同嗜欲

耳溪集 卷八
孰不悅芻豢孰不惡穢濁一或有障蔽本心遂陷溺
惟思飽膏粱不肯安藜藿取舍失毫釐聖狂判舜跖
爭奪既無厭禍患懵不覺相彼蚩蚩物猶能辨荼毒
寄語含齒者慎勿憑口腹

觀鳥啄木

啄木又啄木蟲入木中伏我與汝無怨胡爲來相虐
鳥言爾罪大神明所不釋既自木中活反向木中食
外而剝肌膚內則咀膏液遂令華棟材枵然餘空腹
勢同鼠依社患甚蛇穿屋托身何深巧弄嘴恣飽樂
我將除物害非是甘汝肉乍見避戢戢如聞鳴嗌嗌

木乃遂其壽蟲亦保其族

夜聽楊少尹序感二疏事

清朝二老一朝歸緬邈高風百世稀自愧八旬歸未
得東林馴鶴背人飛

寄紀尙書

彤庭執玉憶新年王會同文廟末筵北斗光瞻東海
外春風氣接午門前片言遠荷千金重尺素遙飛萬
里傳欲識精神相照處一輪明月半空懸

宣德硯歌

紀公旣贈以詩文二序又贖以宣德硯一玉

如意一硯則四旁刻山水人物款識書臣劉
松年頂鑿墨池唇刻雲月及臥牛之形刻其
腹刻御前之印四字下有曉嵐小識稱宣德
舊物外匣用降真香土貼鏤玉瑄如意則以
降真爲榦長矩二尺頭腰尾皆貼雕玉俱文
房之珍也乃作長篇以謝之

宣德硯歙州烏玉剖一片有明盛時厥土貢虹光隱
約上金殿內府巧匠鑿墨池纖月老牛半藏現曾隨
彤管侍寶榻每拭冰繭登曲宴昆明石魚化劫灰未
央金瓦成飛霰河間宗伯癖於古舊物得自學士院

宣德御寶松年畫篆刻分明留石面什襲珍藏置文
几重之不啻連城卞三韓使者赴王會午門一接回
英眇文章契遇自古難同氣相求非我銜許我門路
近正脈何以得此中州彥四海同文無內外叔季繁
音庶一變弘農石友更持贈虞典周誥期鑽研携來
萬里如拱壁丁寧心畫况手拚鞭錘可以破荒蒙繩
削可以裁狂狷滑不拒墨兮澀不留筆一揮何難掃
百絹腹裏應抱天一精勺水經旬猶餘濺文思自此
同泉湧老夫用之氣不倦公乎惠我何鄭重中夜思
之空嬋媛嗚呼千載知音今並世山海迢迢獨不見

玉如意歌

玉如意君子手中器丹桂以為柄雕璧以為珥常隨
雜佩不去身置諸左右惟指使曉嵐先生文章伯手
握權衡臨講肆單車遠躡星宿源隻眼遍窺石渠秘
揮斥狂瀾障泛濫扶持正脉辟淫詖我自東韓執玉
帛公在南宮頌圭瑞不敢越位交言語猶幸因人質
文字二篇長箋垂華袞推引過情良可媿上滌典謨
探源委下逮門戶別真偽譬如輕車遵廣陌雍容折
旋整六轡又似五鼎陳牲牢自調甘酸齏大哉紛紛
吳楚多僭竊屹立高壇抗赤幟謂我麤材餘砂礪猶

勤大匠施鑪錘臨分贈此別有意勉我九仞加一簣
玉兮可比君子德君子存誠貴無二如意兮如我意
長隨我兮無不利

宗姪領相

樂性

今年滿八十命依國朝故事賜

几杖詩以寵之敬和其韻

丁巳

鶴髮桃顏退胄筵烏皮鳩杖自天宣恩光四降元台
席仙樂重臨舊已年肅廟丁巳貞明公主年近
入耄上特賜宴樂故云國有
老成功不運民登壽域化無邊明朝更報星官奏南
極祥輝 貳極連

丁巳冬憲書賚官之回曉嵐宗伯寄詩步其韻

答之 二首

端門執玉一睽分，萬里相思有片雲。
自幸蒼蠅攀驥尾，爭瞻孤鶴立鷄羣。
人間樂事朋從遠，海外神交古罕聞。
珍重瓊詞要後約，白頭何日更逢君。

風稜嶽嶽坐霜臺，司馬春卿歷颺來。
吉甫憲邦文武並，高陽會友子孫陪。
壯遊已躡崑崙遠，奇氣應排積石開。
一別三年山海隔，夢中猶復共含杯。

寄曉嵐紀尚書 二首 戊午

北斗以南見一人，片心相照絕畦畛。
斯文正脈明華夏，多士模楷冠搢紳。
海內知音慙後甲，公與余同甲辰生，故稱後

甲 天門識面自前寅 余於甲寅奉使如燕公時以宗伯立午門外頒賞始識面 慙

勤寵貺無虛歲，爭覩東韓百世珍。 東歸後屢寄詩篇兼贈文房珍品故

寄書以謝云

故人遙隔五雲邊，鴨水燕山路四千。
河漢文章空入望，蓬萊消息有誰傳。
看花對酒應相憶，朗月清風獨不眠。
自恨白頭何見晚，精神惟寄伯牙絃。

送族叔奉賀 秀輔 就養兒觀察關東太太府 奉賀

長子仁浩為東伯

八旬耆社致臣歸，福祿如公古亦稀。
地是桐鄉拖畫錦，兒從棠蔭舞斑衣。
畿氓競逐前巡旆，某水行尋舊

耳溪集 卷八
釣磯更待蓬丘花似繡一雙鳩杖伴春飛

送曹學士錫中以書狀赴燕 二首

文忠昔日戴南冠三載瀋陽雪窖寒好個雲孫持漢節墨胎遺像訪清灤

海內文宗紀曉嵐春官瀛閣坐潭潭午門一接如傾蓋萬里知音在斗南

十載星軺再涉燕玄冬積雪滿山川西園太液春如海疋馬看花讓少年

送奏請副使李侍郎 集斗 赴燕 庚申

昔我賓上國君佩黃龍綬慇懃遠于將贈之以瓊玖

轉頭廿載間居然躡我後吾今凍梨面君亦垂楊肘封儲國之重六月馳四牡王事方靡盬微軀敢自有未暇勉餐飯遄歸莫淹久斗北有神交紀公長禮部胷海吞九夢腹笥貯二酉十年典屬國進退明好醜東方秉周禮旋幹多左右南宮致國書爲我問安否精神在眉睫片言宜虛受鄭產遇晉向然諾由反手寶冊何煒煌郎吏競奔走秋風動鴨水祥雲擁馬首歡聲溢區宇喜氣連箕斗年年玉帛使如君儘不偶悵悵萬里別差池一盃酒須將錦囊詩歸詫耳溪叟

月夜有懷鄭時晦

黃鳥無聲柳眼顰孤墳何處起江濱東京以後無雙
士左海之隅見一人少日聲名鳴玉佩半生出處愧
簪紳焦琴已破牙絃絕新月生時獨愴神

病中夢得頷聯有感而足成 辛酉

閱歷暑寒久掩扉存亡問訊到門稀兒鷄養距能迎
敵老鶴生孫已學飛鼎鼎百年如過隙紛紛萬事摠
忘機夢中猶識重陽節點檢尙方舊賜衣

奉賀洪知敦寧 應辰 進士回榜

科名回甲幾多人完福如公古罕倫六十年前新進
士兩朝宮裏舊僚臣青袍滾滾橫犀帶黃髮皤皤

抗軟巾是日阿孫魁一榜乃爺授職亦殊恩

送正使曹尙書 允大 赴燕

歲暮燕雲積雪深送君萬里且停驂中原志士多藏
市千載昭文不鼓琴海內奇遊吾已再域中大觀子
應三南宮鵠立千官上不問須知紀曉嵐

夢中贈客

桑蓬四方志車笠古人風相逢餘意氣斜日欲還中
夢題畫鷹

丹嘴厲霜鏑金睛放碧空肯顧林中兔威生百里風

耳溪錄

中秋夜登後麓

稍稍行人斷紛紛棲鳥過月高山影小風定水聲多
灑氣看牛斗幽情寄薜蘿虛窓清不寐中夜自高歌

舍弟自貞陵齋所來會遊萬景洞 二首

試策看山杖攀蘿步步登空中聞落葉木末見歸僧
將老今猶健茲遊昔未曾不知山日夕還躡最高層
秋山鳴撼撼行色去翩翩古寺枯藤合崩崖惟石懸
葉深僧臥處雲斷鶴飛邊俯視人寰隔吾今半日仙

秋聲

秋氣清如此騷人莫漫悲且聽鳴不已那問怒爲誰

石溜琴中曲虫聲枕上詩天機聊自樂其奈鬢添絲

山行漫題

奇巖邃壑好攀躋林靄峰嵐意轉迷秋色淺深山上
下禽聲遠近水東西偶逢白衲尋孤寺却愛丹楓坐
小溪乘興去來忘日夕漫成佳句亦無題

暮春出耳溪途吟

小雨春明野行行芳草堤三山當面聳萬柳與眉齊
何處尋牛耳悠然信馬蹄桃花千樹裏茅屋跨清溪

滿山桃李盛開題兼山樓

臥病三春暮幽居太華東閉門千嶂裏高枕百花中

種藥開新逕穿池灌小筒閒中能事足此樂與誰同

卽事

晨興喚小僕荷斧向溪東伐木奇峰出誅蔓細澗通
山仍微雨碧花與夕陽紅滾滾天機妙裁成屬此翁

登紗帽峰遠眺 二首

拔地高無對撐天遂不傾石泉多仰出山木盡橫生
雲自峰腰起風從谷底鳴西南佳氣近知是漢陽城
邈邈神孤往飄飄意欲仙身邊千佛擁頭上一天圓
疋練吳門近東山魯國偏直緣高着脚開眼豁無前
夜聽小瀑無寐漫題

溪聲如急雨夜夜枕邊鳴老睡全爲減塵襟自覺清
漸於物理細時有天機生觀水元多術先民示我程

落花吟 二首

捲簾閒看落來花枝上漸稀階上多自是盛衰同物
我人無恒少奈花何

風不打花花自落歲非驅人人催老由來達者貴行
樂所以君子求聞道行樂不過百年內聞道將期千
歲待多謝世間看花者莫將光陰枉消破

樓前小溪築石成橋

鑿泉幽澗入架石小橋成脚濶通人過頂平容馬行

溪魚尋舊隊沙鳥奏新聲茅屋添顏色憑欄灑氣生
受服省湖阡轉向耳溪

乞服歸田去春光滿華山小車花影外斜日馬蹄間
九曲吾將老三年始得閒披藤看彩壁倚石聽鳴灘
暮春少望同子姪及六七少年遊九曲潭

春服冠童並行尋九曲潭巖花飛歷亂林鳥語呢喃
急瀑添朝雨微風捲夕嵐洞深如睨井峰聳欲捫參
斷壁留題墨澄泓好染藍樵歌聲互答行色影相參
奇石傳彌勒仙蹤指古菴攀藤流遠眺扶杖極幽探
觀水元多術看山不厭貪悠然忘歸路斜日已西含

漫題

爾來習宴坐不復看花吟流水清人耳閒雲契道心
浩然齊物我偶爾寄山林所以顏淵氏簞瓢只鼓琴

見石上舊書戲題

石面書大字大字大如席風雨磨不盡三年猶墨跡
流水齧其上餘沫魚吞食漁人釣得魚魚腹皆黝黑
惟之投水中洋洋歸于壑文字豈不貴微物蒙其澤
聖人始作字志在利物博人有識字禍魚乃飲墨福
我本無心寫初豈為若德昔有郭璞臺臨流洗硯墨
魚皆漆其頭遺種在巴蜀爾魚竟何知時來觀此石

出耳溪

西遊三載拂初衣
疋馬華陰訪古扉
層瀑已隨漂石斷
殘花猶待角巾歸
却誅亂葛通梅逕
更掃崩沙露釣磯
野老山僧來問訊
翁年七十已忘機

登兼山樓見倭紅盛開

小車行轉石門斜
千樹濃陰不見花
惟有一株紅躑躅
當窓灼爍映朝霞

病後出耳溪登水哉亭

謝病歸田舍
扶筇步澗阿
登樓秋色遠
落木雨聲多
舊約青山在
幽情白髮何
好聽耳溪水
終日對清波

有二少年聯轡來訪喜而題贈

山蹊九曲細如絲
獨倚松檉午睡遲
翩翩二妙來何自
繫馬流鶯百轉枝

菊月十三出耳溪聞樊川侄叔度

樂任 熙叟 就

榮 父子來拜先墓仍遊九曲洞天留詩而去辭

工而情到為步其韻却寄

三首

天冠擎北斗
衣烏托東臯
燕尾雙溪合
龜頭片石高
自慚忠孝忝偏幸
聖明遭欲識
詒孫遠須看種德

勞

碩人賦在澗
處士歌鳴臯
知足元非勇
辭官豈自高

琴樽歐與隱山水柳相遭多謝樊川子躋攀不憚勞

屬叔度

銅符隨玉節跌宕浪江臯文彩青衫少歌吟白雪高

聖恩嗟未報勝事更難遭共占鳴牛地休辭跋馬勞

屬熙叟

少望季常

樂倫

熙叟來訪于時楓色正酣携入

九曲少憩月影潭轉上玉鏡臺煮菊飲酒盤旋

於紅流白石之上薄暝乃歸拈韻共賦

霜落天高嶽色清披雲度壑散幽情層層錦石流霞

氣曲曲風松和水聲對酒坐忘山影倒回驢行踏夕

陽明却憐短髮心猶壯喜看諸君步履輕

樊川父子歸賦五七律各九首見贈藻彩絢爛

音節鏗鏘不覺楓菊奪鮮礪瀑增響老夫三鼓

氣竭只和數篇以謝之

四首

秋風動江漢落木下亭臯曠野虫吟細晴天鴈影高

黃花宜共把青眼况難遭九曲多奇賞寧辭步履勞

豈無千里馬難遇九方臯伏櫪才虛老羈金價始高

清音宮羽振休運璧奎遭傳世詩書訓須加鑽蹟勞

屬叔度

風標晉阮仲詞藻漢枚臯蘭圃新芽茁麟郊一角高

溪山多勝賞花樹亦奇遭戛玉紛盈耳唱酬亦忘勞

屬熙叟

文明當舜禹黼黻愧夔臯才乏三長妙功虧九仞高
自憐頽景逼虛負盛時遭願獻豐年頌仰寬宵旰勞

右自道

暮春出耳溪

三載還山百感生澗聲禽語摠無情少時意氣千勻
重老去行藏一羽輕白髮看花慚水影緇塵掃室愧
書檠村童莫問翁年幾渭叟西來減二齡

將歸留題

花既衰矣我當歸綠陰繁時是後期看花聽瀑還多
事不盡春光滿袖詩

耳溪集卷八 終

耳溪集卷九目

詩

賡載錄

喜雨詩七言十韻

寒食東風御柳斜七言十韻

文武兼用長久之道五言律詩

禁苑楓林葉葉紅七言二十韻

賡和 御製示寶鑑纂輯諸臣詩韻

賡和 太廟臘享詩韻

是夜復與筵臣賡進聯句

賡和 駕過高陽詩韻

賡和 駕駐高陽郡舍詩韻

賡和 祈稔閣詩韻

賡和 洗劍亭詩韻

對此欣登歲披襟弄五絃七言二十韻

賡和 洗心臺賞花詩韻

內苑蘭亭會應製

賡和 賜耆社諸臣詩韻

人瑞錄進箋日聯句

賡和 慈宮周甲誕辰志喜詩韻

賡和 頌尺詩韻

賡和 華城行宮詩韻

賡和 駕臨訓練院詩韻

賡和 贈領府事洪樂性江亭之遊詩韻

賡和 題手圈諸書詩韻

賡和 謹題敬奉閣詩韻

賡和 將拜 獻陵步戊子詩韻 二一首

賡和 敬題 獻陵齋室詩韻

哀輓錄

貞聖王后輓詞

仁元王后輓詞 六首

英宗大王輓詞 十首

又七首

文孝世子輓詞 五首

正宗大王輓詞 十首

哀旅菴申承旨 景濬

哀月巖李叅奉 匡呂

哀江漢黃太史 景源

哀良翁李京尹 獻慶

哀芝溪宋處士 載道

哀小瀛洪進士 秉哲

哀修井鄭尙書 景淳

哀震澤申承旨 光河

百歲老人李知事 堞輓八首

李獻納潤甫輓 四首

鄭承旨聖從 純儉輓

鄭驪州 夏彥輓四首

李進士 敦恒輓

李察訪 榮鳳輓三首

活山南叅奉 龍萬輓

族弟九臯處士士良 儒浩 輓

洪長城載汝 景厚 輓

耳溪集卷九

詩

賡載錄

喜雨詩七言十韻

丙子夏久旱 上親禱于 太廟卒事而雨

竟日 上喜甚手書喜雨詩三字命禁直諸

詞臣製進臣以文學直春坊應製 上命招

弘文提學定高下於前席置臣作三上一居

魁以 御筆書虎皮一令賜給六字於券尾

魁元以下各賜紙筆墨以寵之

望雲彌月久憂民左介晨開聽溜頻宋代歌謠歸聖
主周氓安集賴文人前冬積雪休徵驗半夜同雲淑
氣句乍見靈靈沾蓓蕾終看霖霖潤畦畛青青野色
占多黍處處田謳出四隣是月 至尊躬夏禴中宵
甘霈屬齋辰精誠儘有通神妙陟降應垂及物仁風
暖宮花開次第塵清輦路氣氤氳聲和玉漏香烟濕
喜動 天顏色笑新更願益推方寸雨恩波均灑八
埏春

寒食東風御柳斜七言十韻

癸未春以
承旨應製

榆火寒烟碧似霞禁林春色浩無涯千山淑氣初含

雨萬樹祥飈欲放花是月 君王居左介御溝楊柳
坼新芽柔絲拂地彈金帶嫩眼和烟籠翠紗裊裊長
枝堪繫馬毵毵短葉不勝鴉風飄桂苑昭光遍影入
桃蹊瑞旭斜好看發生皆造化縱教攀折亦繁華鷄
鳴廣陌趨晨珮鸞轉清陰散晚衙故事漢宮傳熟食
風流洛社煎新茶願將青瑣千條線長繫東天化日
賒

文武兼用長久之道五言律詩

丙戌冬 上親臨慕華館試射武臣堂上下

御題命從臣應製臣以承旨製進翌日命招

大提學黃景源科次置臣作第二

幄殿風雲動金郊仗衛嚴中紅千耦並抽白五言兼
張弛元多術靈長自此占太平傳盛事眉彩近臣瞻

禁苑楓林葉葉紅七言二十韻

已丑秋以承旨應製

黃花白露霽雲籠紫籞秋深元氣中晴旭在山都是
錦上林何樹不成楓酣如中酒枝枝遍爛若流丹葉
葉同生伴楚江后皇樹栽來漢陛幾多叢團團厚葉
偏宜雨嫋嫋輕柯不耐風靈液有時成虎魄奇形或
說化仙翁芳春翠榦連青瑣朱夏清陰近綵權天地
初回蓐收節 君王時在慶熙宮輕寒不入瑤堦草

嫩葉先飄玉井桐授簡華筵酬 聖節停鑿御苑樂

時豐恠來此地千林綠底事今朝一樣紅始訝東風
花氣爍還疑南極火山烘金緋簇映渾欺色宮繡栽
成詎擬工濃淡色分霜早晚朝晡態異殿西東彤霞
蒸處偏侵頰赤日春時未定瞳光寫龍池明箇箇影
隨仙蓋舞童童物華正待 宸遊愜秋令翻回淑景
融草木被光歸造化雲星增彩賁神功長留渥赭添
靈莛益勉披丹激寸衷更把枝頭紅萬片徧題嘉頌
未應窮

賡和 御製示寶鑑纂輯諸臣詩韻

庚子秋 上以 列朝寶鑑未有一統成書
命詞臣十二人就春秋館抽金櫃之秘分掌
纂輯臣以同知春秋纂修 中廟寶鑑始開
局 上遣近臣宣法醞下御製五言律詩以
寵之與諸臣製進

御製 御製承命冠首下同

列朝盛德事巍煥可能忘縱有名山祕惟憑寶鑑詳
諸臣摸日月小子寓羹墻一統書成後治謨萬世長
賡詩

金櫃留鴻烈環東澤不忘只慙描未盡敢道為頗

詳萬世傳周範 重宸寓舜墻需雲均飽德湛露
頌聲長

賡和 太廟臘享詩韻

癸卯臘月 上親行臘享于 太廟前一日
齋居望廟樓夜下御製詩命諸臣賡和臣以
副摠管製進 御考居魁仍御書御製詩鐫
揭于樓又命近臣聯書賡詩揭于下

御製

於乎我何述 皇祖每躬禋廟貌攸瞻地樓名寓慕
新塘流餘溥澤樹蔭又長春敢道寒威重微誠是日

伸

賡詩

漢臘迎佳氣周宮肅肇禋凝旒思正遠聽瑟慕逾
新觀德於千世祈年又一春宸詩揭松栢 聖孝
此焉伸

是夜復與筵臣聯句

內閣直提學鄭志儉徐有防原任直閣金憲待教李

崑秀檢校待教尹行德行承政院都承旨沈豐之行左承旨朴祐源右副承旨李時秀別雲劔弘文館提學徐有隣寶劔都總府副總管洪良浩金尚集

夙戒龍旂大禧承

御製

宸誠不憚沍寒凝天時夏蜡方迴節臣有王政周

凌已納冰慕切羹墻躬歲禴臣良禮殷鐘磬薦冬

烝黃流氣與心香注臣尚朱瑟歌將駿烈登此日

肇禋光 祖考臣有自天純嘏錫孫曾享期未到

誠先篤臣志齋夜方闌念愈兢萬籟收聲更漏下

臣祐千官整佩月星澄玄端穆穆愀如見臣豐第

祿洋洋降不勝壁揭璇題思益永臣憲筵賡寶什寵

徒膺邇班倍覺今宵幸臣時盛禮長期每歲仍天

為降監寒自退臣崑人爭歌頌日方昇元春更擬

祈年夙臣行

三白先占大有徵御製

賡和 駕過高陽詩韻

甲辰八月 上幸 永陵還駐高陽下御製
與諸臣賡進

御製

月色燈光百里通曉天風颭萬旗紅高陽父老多相
識十載三過此郡中

賡詩

行幄天開四望通清秋繖蓋拂雲紅今年大有仍
蠲稅士女歡聲輦路中

賡和 駕駐高陽郡舍詩韻

丁未八月十五日 上幸 明陵還駐高陽

郡下御製曰是日即 明陵誕辰也祇謁本

陵歷拜 昭寧園還住高陽郡舍吟示四韻

於大臣閣臣文苑諸臣命和

御製

祇拜 仙陵又拜園清秋佳節是中元龍盤地護鸞
峰大象設天成古嶺尊明月一年多此夜黃雲四野
已前村行宮試士同文武兩邑先推慰悅恩

賡詩

霜露清秋謁 寢園洋洋遺澤在元元勤民政是

三農重法 祖誠為百行尊觀稼盛謨瞻草閣興

王異瑞想陶村 草閣在昭寧園齋舍之後先朝龍潛時所嘗觀稼處扁曰祈稔

閣陶村即甕店在園所前先朝龍潛時堪輿人過呼一句云金鷄鳴而搏翼王氣藏於甕匠本園

近處有鷄鳴山云先朝嘗舉誦於筵席臣所仰聆者也年年輦路省耕斂髻

白爭謠粒我恩

賡和祈稔閣詩韻

駕到古靈園御祈稔閣觀打稻次壁上 先

朝御製韻命從臣賡進

御製

三度 先王觀刈年祈豐數畝即堂前秋晴是日黃

雲熟肯獲微誠更愀然

賡詩

五紀馨治屢有年七言奎藻揭堂前欣逢 聖孝

重觀穫昔日從臣更愴然

賡和洗劍亭詩韻

九月 上閱武于鍊戎臺歷臨洗劍亭次

先朝御製詩韻命從駕諸臣賡進

御製

詰戎餘意此臨亭漢北天高畫角清可愛泉源深有

力泠然一道萬山聲

賡詩

洗劔臺今駐蹕亭蒼松翠壁擁欄清詞臣競獻龍
池頌山鳥皆成鳳吹聲

對此欣登歲披襟弄五絃七言二十韻

庚戌春承命製進御考置臣作三中居魁賜

豹皮

金宮朝罷坐淵蛸殿角微風拂柳烟乍看霰霏霑細
草候聽滂沛潤平田三春淑氣生千樹四海歡聲入
五絃大業初成胡越混宏規將邁商周前死囚懷德
咸歸獄學士論治迭侍筵鴻化已登歌七德狼烟不

起靜三邊量恢來諫鵠藏袖誠切憂民蝗下咽每到
元春先祝歲恒言上瑞卽豐年前宵畢宿初離月是
日陣雲忽滿天池底鳴蛙爭啞啞樹端喜鵲競翩翩
俄然飛脚從天灑忽爾懸鈴墮地圓苑樹着來翻舊
蔚宮花綻處倍鮮妍均沾四野占多黍慰滿三農遍
九埏次第水耕仍火耨續紛北陌與南阡爭騰甌窶
盈篝頌從此玉樓高枕眠麥隴將看莖兩穗米商應
報斗三錢聊將擊壤歌中意遂向薰琴曲裏傳流水
響從膝上起阜財化入指間宣颯颯大雅添新譜穆
穆清風生細氈始識貞觀天子德長傳詠雨五言篇

賡和洗心臺賞花詩韻

辛亥三月 上詣 宣禧宮歷臨洗心臺賞
花下御製命侍臣賡和

御製

暇日芳春節心臺洗浴喧兩山真一戶千樹亦同園
灑灑天光靚登登地勢尊坐間多皓髮來歲又今樽

賡詩

日暖龍旂轉花迎鳳吹喧清鑾隨曲水行幄抗名
園白嶽神都壯紅雲寶榻尊 宸章侔喜起和氣
溢衢樽

內苑蘭亭會應製

癸丑三月二十日癸丑 上御後苑之籠山
亭命召數三老宰臣與閣臣承史將行流觴
之會適雨下終日遂未諧諸臣聚坐曲水邊
清漪亭賜酒飯 上召見諸老臣集蘭亭稷
詩六句締成二篇遂令會者隨所長賦之賤
臣進七言古詩二十韻

御製

葩蒸映林

王之彬

和氣載柔

王之義

泛泛輕觴

王之華

凝泉散

流馥焉若蘭

謝安

袁嶠

今我斯遊

王之肅

三春陶和氣魏滂萬殊莫不均王羲之光風扇鮮榮謝萬回

波縈游鱗謝真契齊古今王渙宣尼邀沂津桓偉

賡詩

紫籞祥雲會衿紳少長聯裾曲水濱星回癸丑今
千歲地轉山陰又暮春林風細送和鑿曲花雨先
清輦路塵蒼松脩竹鳴好鳥碧礪清流見躍鱗臨
池小閣移玉座夾岸芳草列詞臣飄搖羽觴隨波
轉次第香醞到手頻江左風流今再見永和羣賢
數更均况逢咫尺陪勝讌盃酒從容視家人仙厨
賜食均醉飽天香入髓覺氤氳宋代花鈞猶等閒

沂水風雩可比倫君臣胥樂風雲會氣象同流天
地仁王謝當年何曾遇徒傳鼠鬚筆有神上林佳
氣增葱藹華山秀色更嶙峋一雨均霑千里疆兩
歧將歌百畝民雪宮授簡才敢擬栢梁賦詩事可
遵四言五言各言志如詩不成罰三巡安得更倩
龍眠手毫端描寫太平真白首躬沾恩浩蕩青丘
爭頌化醲醇更願千春常如此寶曆長與甲子新
須看太史抽彤管盛事鋪張垂貞珉

賡和賜耆社諸臣詩韻

癸丑臘月上追想 英廟癸巳親行者臣

考績進饌用粥品賜詩以粥字韻之盛事命
 者社行貶坐以十一日會于本司度支供宴
 床設各色粥 上用 英廟御詩韻并序以
 寵之翌日諸者臣進箋謝恩 上召見命以
 子孫扶入宣饌 元子宮侍坐各賜新曆於
 諸者臣筵退聯書賡和詩鐫揭于者社是日
 領議政洪樂性年七十六領中樞蔡濟恭年
 七十四綾恩君具允明年八十三水原府留
 守李命植年七十四前兵曹判書洪憶年七
 十二判敦寧任希曾年八十一藝文館提學
 洪良浩年七十知中樞尹坊年七十六工曹
 判書邊得讓年七十一右叅贊洪秀輔年七
 十一前兵曹判書金尚集年七十一前禮曹
 判書趙瑗年七十四前刑曹判書鄭存中年

七十三知敦寧宋
濟魯年八十三

御製

善養猗歟憶 兩朝茲年述事又頒粥我家祈永於
千休錫福由來在歛福

賡詩

堯階化溢康衢樽周鼎恩霑正考粥拜獻一千五
 十齡願添 宸極無疆福
 人瑞錄進箋日聯句

甲寅九月 御定人瑞錄成先是 上以是
 年卽 慈殿寶齡五旬 慈宮寶齡六旬曠

千載一有之慶會月正元日率百官稱賀于殿宮大覃中外賜朝官七十以上士庶八十以上及未八十而夫妻偕老者爵有差凡七萬五千一百四十五人乃召耆耆臣六卿以上指授義例彙為一書名曰人瑞錄命內閣印布至是工告完耆臣領議政洪樂性等具箋以進 上與元子親受于壽康齋耆臣各以其子孫曾玄扶將而入禮既成 慈宮宣饌諸耆臣皆三呼獻壽于時 元子宮侍坐耆臣以次進拜 元子答拜 上下御製七

言古詩二句命登筵耆耆臣及諸子孫聯韻

以進

領議政洪樂性領中樞蔡濟恭綾恩君具允明判中樞李命植知中樞李敏輔

行司直洪楨判中樞洪良浩判敦寧金持默行司直趙瑛知中樞邊得讓左叅贊洪秀輔行副司直尹坊行副司直金尚集判尹申思運行副司直鄭存中行副司直申應顯行副司直鄭景淳行副司直範祖並與校閱而尹坊鄭景淳行副司直丁範祖進箋時有故未叅

南極雙輝寶婺昌錫敷人瑞頌重光

御製

聖化普洽滄海左天眷篤斐漢水陽

臣樂性

天遣壽

星主東海夜夜光如日出暘

臣濟恭

恩荐長欣頭戴

日年多何惜肘生楊

臣允明

席上犀金同賁飾域中

龜鶴盡搜揚臣命植化遍朝野日方舒頌騰簾闥風

微颺臣敏輔八域同慶恩光遍一庭咸筵頌聲洋臣憶

寶曆爭瞻嵩華大奇祥奚啻羽毛翔臣良浩歡均八

垠逢昭代願切千齡祝 聖王臣持默重歌迭奏景

錄新 慈化均沾恩波泱臣得洪福摠迺祈 殿宮

聖恩覃洽養膠庠臣得讓共將華封萬年祝欣覩周

家一人良臣秀輔是日天晴老人見滿闕祥靄繞畫

樑臣尚集魏庭賜菊沾壽酒蜀溪採杞饒仙糧臣思運

盛恩覃遍域內老御醞香排雨後涼臣存中孳齒五

百八十萬齊獻宮中喜無量臣應顯年瑞滋臻敷五

福天心克享繼三皇臣光我 后錫福元何由忠

侔于夏質侔商臣慧○子孫聯句不盡錄

賡和 慈宮周甲誕辰志喜詩韻

乙卯六月十八日 惠慶宮周甲誕辰也

上奉觴上壽於延禧堂特召 慈宮同姓四

從親異姓三從親與宴下御製志喜詩各令

賡進

御製

吾東初有慶花甲萬年觴是日虹流屆如雲燕賀張
含飴長樂殿被管老萊章觀華仍餘祝覃恩暨八方

賡詩

璇樞回寶甲萱陛舉瑤觴魚藻周親會鸞笙舜樂
張籌添重潤海線進七襄章 聖孝揚 慈德洋
洋化四方

賡和頒尺詩韻

丙辰仲春朔日 上修中和節故事頒尺于
公卿近臣帶詩以寵之

御製

頒尺中和節紅泥下九重拱星依紫極累黍叶黃鍾
漢帝提三日陳君臥百容裁來五色線許爾補山龍

賡詩

瑤尺從天下七襄裁幾重衡如擎北斗筵以發洪
鐘繡就乾坤服文成日月容春和攀寵賜賡載愧
夔龍

賡和華城行宮詩韻

丙辰正月 上幸 顯隆園駕巡洪範鳳鳥
諸山夜還華城行宮有御製追命賡進

御製

皇皇瞿瞿更依依若覲如聞未忍歸岨矣高山天與
宅恍然原廟月遊衣烟花袍笏羅千嶂鑱鑰金湯冠

兩畿歷騁霸陵還有意城隍少駐六龍飛

賡詩

喬山每歲寓瞻依蹕路遲遲未遽歸鳥語含春留
鳳吹松風拂露灑龍衣千年佳氣凝 仙寢三輔
雄城壯上畿陟降洋洋監 聖孝花岑常見白雲
飛

賡和 駕臨訓練院詩韻

戊午九月 駕臨訓練院下御製承命賡進
又奉教書 御製揭于院壁

御製

萬馬齊嘶細柳烟畫欄東頭入瑤躔徐行劔槩飛騰
際高坐雲龍動盪邊豪傑不生天下大山河長鞏海
東全三營介冑雄如虎爭出燕然勒石前
鍊戎高閣鎮城東闔闔風雲指顧中寄語桓桓諸將
士須看三箭破心紅

秋色蒼然若木西萬家烟樹畫中迷坐來高處元如
許泰岳嵩山一望低
碧瓦平臨紫閣南南山佳氣聳層嵐鳴弓試劔皆從
此手取金壇上將銜

誰遣胡塵滿塞北春秋時講汾師直楚頭吳尾問如

何起覘秋空攙搶色

回憶元龍百尺上瞳瞳朝日繞金帳兵家奇正何須
論直送長風捲海浪

水犀襦褶簇戲下梨花劒氣桃花馬卽今四海皆腥
羶誰是關山轉戰者

卿在西營時承命印進五山集集中樑文膽揭是
院適因臨院見楣上六偉之頌用其韻而道其實
卿以文衡在陪班以吟得兩詩示之卿可賡載間
用杜工部簾法卿作亦準此

賡詩

玉輦葳蕤出禁烟紫微河魁動奎躔雲龍繚繞和
門外日月昭回寶榻邊四海會同何處是三軍節
制此中全須看萬隊如熊士環立無聲陞戟前
龍虎奇門起自東丈人高坐在師中三軍進退無
常法屬目招搖一片紅

清秋鈇鉞下山西千里烟塵望裏迷前騎暗傳沙
塞報玉門關外鴈飛低

軍中齊唱戰城南殺氣陰山捲曉嵐壯士起看陣
雲際旄頭一點嶺頭銜

剛風號怒大荒北極目狼烟千丈直安得燕支一

王溪集 卷九
箭收坐令胡婦無顏色

和戎偃武策之上金鼓不鳴閒玉帳八域蒼生歌

太平百年青海靜無浪

青邱地分房星下綠陰好放華陽馬魯人競頌思
無疆看取駟駟在野者

賡和贈領府事洪樂性江亭之遊詩韻

九月誕辰後領府事率子孫出遊漢江夙夢
亭 上下御製以寵之又各書一紙下于賤
臣及族叔奉朝賀秀輔使之拚和儘曠世之
盛事闔門之殊榮也

御製

人瑞篇中最上頭好將洪福贊皇疇韶顏白髮遲遲
日丹木黃花灑灑秋平地神仙添海屋晚天絲管鬧
江樓更看八十城西老車馬應從綠野遊

賡詩

耆社高年讓一頭私門錫福頌箕疇華封祝聖聯
三老虹渚凝祥屬九秋好向漢臯聆鳳管爭擎雲
翰下龍樓躬逢盛會霑殊渥歲歲芳辰卜此遊

賡和題手圈諸書詩韻

御定手圈諸書成經而三禮史而兩京子而

五子集而八家陸稿既批而圈既圈而鈔遂
成一帙至是下 御製七言十韻蓋臣嘗承
命製進八家手圈跋文也

御製

萬幾餘暇講聲長閱歷穰穰秘府藏月窟天根來往
計姬情孔思點勻方內家筆札紆文墨上世弦匏記
后蒼篇帙縱橫名手圈權衡次第整書綱卜年八百
周官制載籍三千戴禮場二子程朱傳道統兩京班
馬盛文章午朝工課猶經史乙夜精神更縹緗遂到
鹿門張鼓吹况看牛坵匣衣裳從知直諫先推陸自

是宗臣盖有唐刪述祇要存聖軌源頭一畫跡羲皇

賡詩

斯文一派發源長元氣冲融衆妙藏奎壁麗天森
有象圖書呈瑞化無方 聖人首出當箕尾文字
心傳滌皦蒼玉斗珠衡裁宇宙天經地緯絜維綱
操戈上下百王室直轡縱橫三禮場羣聖微言未
墜地二京良史紛成章經綸一陸明絺繡辭藻八
家排素紉獨闡洛閩尊統緒重回鄒魯賁冠裳大
哉筆削承洙泗小矣規撫陋漢唐事業煌煌垂簡
策折衷千古詔思皇

賡和謹題敬奉閣詩韻

閣舊在兩闕槐院奉藏皇朝誥勅之所已未
秋移建於 皇壇之西移奉誥勅後下 御
製命賡進

御製

江漢朝宗萬里濤皇恩浩蕩注麟毫唐堯并立山河
鞏周稷重光日月高草木皆知今鰈域風雲猶帶舊
龍袍昭回北苑瞻新構百世吾東奉赤刀

賡詩

捷伐皇威靜海濤扶顛帝力及秋毫蟲魚并育生

成澤光岳爭瞻覆燾高北苑百年藏誥勅東韓千

里獨冠袍須看中土遺民集揮涕高麗使者刀故相

臣鄭載嵩隨其父赴燕道遇文士魏祥贈以佩
刀祥子世傑文集載高麗刀記珍藏世傳云

賡和將拜 獻陵曉次舟橋步戊子前韻詩韻

英宗戊子展謁 獻陵 上以世孫陪駕後

三十二年己未秋九月復幸本 陵下御製

步戊子前韻詩二首敬題齋室詩一律命賡

進蓋在朝而再瞻是 陵之行幸者只餘三

人而臣其一也

御製

鸞蹕秋晴鷺水湄滿江濡露想前時依然戊子春三月十里船開七字詩

羽林旗鼓匝青烟龍鳳津樓月上天却憶廣陵春水外回瞻梧岫彩雲邊燈光歷歷江聲動兵氣森森野色連漢渡東南松栢永此時孺慕更多情

賡詩

千官萬騎壓江湄白露香菰八月時滿野黃雲呈上瑞農謳爭獻屢豐詩

寶繖龍旂拂曉烟中秋月色滿江天貍貅陣接喬山外鵝鸕塵清漢水邊百里雲霞濃欲滴萬年松

栢翠相連 聖神光繼無疆業奎藻重攀卅載前

賡和敬題 獻陵齋室詩韻

御製

地自鍾山漢水行真龍體勢大經營禮三十載今朝又基八千年宿夜聲薄海豐功仍本本承天大德曰生生周旋優優於何覲瑞日秋天萬里清

賡詩

龍驤玉輅啓戎行萬幕平沙夾水營日出喬山雲有色風微輦路鳥無聲萬年垂統功逾遠卅載觀光感更生惟戊從臣今白髮恭將嘉頌穆如清

哀輓錄

貞聖王后輓詞 丁丑

大邦今覩妹京室早于嬪慶毓龍潛際儀尊翟御辰
鳴璜侍長樂調瑟友 中宸儷日文章煥承乾雨露
均每懷 璿殿感匪懈 廟園禋躬歷艱難備天綏
福履純閨房堯舜聖家壺子孫詵視膳周宮曉含飴
漢殿春深存游馬誠頻起聽鷄晨一德叅皇極十臣
有婦人陰功雖寂默玄化自醲醇允叶黃裳吉終膺
玉牒頻星回重甲子岡祝昔壬申 母範臨三紀靈
籌嚮七旬柰簪俄報讖桂魄忽沉輪繭館餘殘葉椒

塗閉暗塵函封留 御札墻慕見終身薄海如喪妣
慈恩盖浹民蘭幃纔永閭萱掖又遐賓黔首嗟無祿
蒼穹豈不仁殿分開素幄庭別哭羣紳是月溫風至
長秋遠日臻山連金盃葬花共玉欄巡陟降應無遠
晨昏倘復親芳猷徵寶墨美謚勒貞珉鍊石神功歛
容衣儉志遵雲迷移月御雨泣送靈輜不盡青闈淚
朝朝撫鏡新

仁元王后輓詞 六首 丁丑

五紀尊臨壺範昭 慈恩久播巷閭謠周家十亂稱
文母宋代三朝仰女堯戚屬皆遵車馬戒民憂常軫

雨暘調 徽音克配 寧王德十冊揄揚詎盡描
邦國安危歲在辛鴻基宥密賴 慈仁憂深 社稷
扶宗緒策決簾帷降尺綸媧石鍊成天五色虞淵捧
出日重輪于今薄海咸歸極方驗坤元化有神
南極星朝寶婺巍天家弗祿古來稀桃盤競獻齊崑
算萱砌長停愛日暉 聖子七旬萊是服曾孫百院
尺添衣秋來不復稱康爵長樂淒涼掩總幃
內掖深深夜漏分 玉音嗚咽近臣聞靈丹莫賴軒
岐術金匱空藏冊祝文纔賀翌瘳還瘞璧正祈岡壽
忽升雲燈前代草殘毫在欲寫哀章雪涕紛

昭容擊出十行書捧讀庭僚泣濺裾寢器尙留庚歲
薦箱金不費地官儲窮瀛子弟爭攀紉大耋 君王
遠護舉盛烈何煩彤史紀煌煌寶墨日星如
痛哭厥儀次第催翟禕先陟數旬纔看花欄共仙輶
遠泣竹山聯寶榻開宸扁忍瞻三字號嚴廬長抱六
時哀年年 聖節端暉閣社飯悲添九月回

英宗大王輓詞

十首
丙申

扶桑瑞旭啓休明元氣東方有篤生運叶丹莫初載
甲祥符朱邸大橫庚檀箕幅域包羅遠姬妣文章損
益成一掃妖氛天宇淨青臺報道泰階平

王漢集 卷九
殷后銘盤在檢身周王吳食是憂民菲衣化自宮闈
始減布恩先夫里均暮歲尚勤三晝席元春每降十
行綸廈氈一念惟暘雨近侍頻瞻八彩嘖
於乎不顯德之純小學書中踐履真百行有源東準
海一誠無間上通神春回長樂躬稱學歲展 喬陵
涕迸巾尚憶丁年三月夜端暉門內露祈辰
黃傘葳蕤寶帟張一壇芬苾並 三皇悲深日暮言
猶在夢斷河清感更長齋殿凝旒宵秉瓚彤庭明燭
曉迎香臨軒每試忠良後直樹風聲萬世揚
皇極治從古聖傳宏規高出百王前鷄鳴犬吠三千

里海晏山晴五十年材有短長歸尺度物無妍醜入
陶甄輝煌制作於斯盛心法先求自省編

堯齡咨舜重華協岐業傳昌聖德昭八域爭瞻明兩
作萬幾分聽日三朝瑤觴激灑承歡夕 玉色愉怡
問寢宵羲馭不停春欲暮蒼茫梧野白雲遙

薄海窮山仰 聖君金編玉簡詎能文村童解誦詩
書語機女羞爲錦繡紋天上忽收南極曜人間無跡
太虛雲哀蟬流火東門路鬢白攀號雪涕紛

和句留作後王程淇竹難忘沒世情書帶數厨符廟
號仁包四德表陵名湖山魚鳥皆生息冠冕孫曾半

老成簪筆小臣今白髮短篇哀誅欲吞聲

廿載從班侍九重一身頂踵是陶鎔金華代草曾何
日便殿橫經愴去冬篋裏尚騰飛白氣夢中如覲
渥丹容傷心集慶堂前路清漏依稀待曉鐘

千官曉立羽旄張仙蹕依然輦出房鳩杖永違靈壽
閣龍輶遙指 健元岡弓髯杳邈空雲影燈燭熒煌
雜曙光黃鳥微誠何處效一回揮涕九回腸

又七首 代作

雲開瑞日出虞淵天佑 三宗一脉連皇極再傳箕
子國初元重屆帝堯年羣陰盡廓神戈掃萬象難逃

寶鏡懸鴨綠以東長白北熙熙鑿井與耕田

孺慕猶於匹庶難純誠宜並舜曾看七年侍湯衣無
解五月居廬袖不乾長樂禮隆揚十冊王春義大秩
三壇 文孫善繼承身教愉色龍樓日問安

豐功大業蕩難名繩尺元從小學程精一執中傳授
妙奉三臨下範圍宏寒祈半夜冰旋合露禱炎天雨
輒傾五紀垂衣疇得似康衢以後再昇平

記注當時厠禁廬摸天筆短不勝書恩空囹圄先除
烙稅減租庸下及魚耆老禮成三揖後粢盛供是五
推餘煌煌典誥昭雲漢留得金編滿石渠

東土昌期屬泰亨西樓寶帖繼崢嶸宵衣六對隨鳩
杖春酒千年酌兕觥域內何多黃髮老天南偏覺壽
星明靈丹亦待 聖人出九葉蓂成童子形
萬幾分勞仰繼明鴻基盤石奠 宗祊瑤觴禮洽三
朝養銀印光生 貳極誠勤敬相傳承 列聖謳歌
有屬慰羣情春暉欲暮雲鄉遠孝思那堪翼室迎
清晨羽衛出東廂鬢白傾城野哭長金尺神功符
聖祖珠丘吉卜接崇岡衣冠月出應先後弓劍雲間
竟杳茫經幄小臣偏沐澤忍和清淚寫哀章

文孝世子輓詞

五首
丙午

彤霞丹棗早呈祥三載承華闕少陽斗電節符秋九
月謳歌慶叶日重光賓僚競頌溫文就黎庶咸祈德
業長何意周齡終不驗天心物理竟蒼茫
萬世琮璜有啓賢七章瑜佩儼离筵都無嗜好惟書
耳每見怡愉卽性然冊歲講辰追 列祖晴雲朗日
驗仁天英姿異行今安覲字字 宸辭共涕漣
纖纖細葛出宮機佳節端陽獻尺衣學語便承隨物
誨扶床猶解問安歸起居乍損三宵直哀慶相乘萬
事非齒胄開筵方屈指忍將縞素向青闈
重熙堂下侍臣忙泣道庸醫術不良翼日三呼將獻

賀前星一夕忽收光百身未贖空垂白諸福無徵欲
問蒼威我 聖心臣竊恐短詞哽噎不成章
門掩銅龍月屢移雲迷笙鶴去何之彤庭莫喚承言
色玄室空傳上謁儀咫尺珠丘神不隔依稀寶幘夢
如辭天長地久無窮恨聖作人間只五朞

正宗大王輓詞

十首
庚申

熙運東方大啓辰肇開鴻業又壬申珠衡玉斗惟天
縱玄冕黃收儼 聖真元氣養成承往哲斯文永賴
惠來人皇王千古云誰似湯敬文純在檢身
三朝未洎百牢養廿載匪心千乘尊卑室澣衣由所

性金泥玉簡詎能言乾坤覆燾元無迹雨露生成不
自恩耕鑿何知惟飲食鴻功沒世竟難諉

達孝曾從錫號知大猷本自篤行推春祠夏禴皆躬
享月覲日瞻常淚滋樂舞禮昭隆殺節 宮園儀酌
古今宜遲遲臺上年年駐靈雨偏霑翠栢枝

金門奎閣作書厨道學淵源接孔朱精義發揮左氏
傳微言洞析濂溪圖文章浩瀚同河漢綸綍宏深合
典謨恢廓靈襟誰鑽仰萬川明月晃天衢

精一相傳德業長初年代攝贊 寧王尊攘大義崇
名節平蕩弘規在憲章禹鼎高懸魑魅伏麟經昭揭

日星光煌煌制作詒謨遠末命那知五月揚
九重宵旰在民憂五日賓筵首講求鄉約移風羣飲
射農書應旨力鋤耨調飢澤溥民無瘠掩齒仁深巷
有謳疆土日開聲教遠厚州北設西慈州
月朔 親臨講席開和風時雨斐然裁譽髦濟濟文
王士縫掖彬彬闕里才追琢圭璋成美器鏗鏘琴瑟
養瓌材于今太學騰歌頌銀字嘉賓有賜盃
微臣簪筆自 英廟服事 先王最盛遭身墜鬼門
勞剪拂名登詞苑荷甄陶與王寶典擎雲翰八子題
辭侈袞褒屈指數年餘至恨永違靈閣獻蟠桃

前殿猶瞻寶座巍端門何事舉龍旂纔驚萬姓攀雲
馭忽見羣靈擁紫微天上星河收影子人間草木餘
光輝白頭恨未隨黃鳥忍把彤毫撰德徽

積德洪基仰 列朝萬年磐石鞏 宗祧重華繼聖
傳 文子元祐深仁戴 女堯天地秘藏仙隧近晨
昏侍奉玉欄高傷心豐沛樓前路縞素遺民導羽旄

哀旅菴申承旨

景濬

夫子南國秀高視宇宙寬學貫天根奧文倒滄海瀾
星經與地誌錯落指掌看射策觀上都雜佩鳴琳玕
潤步騁雲衢高標振峩冠北躡楛矢林南掣朱鳥翰

空成汗漫遊未窮扶搖搏我於世寡偶與子托金蘭
襟期淡若水精神炯透肝揚扈丘索際揮霍造化端
奔驥下長坂飛石劈層湍追攀邈難及短武恟蹢躅
有時片言合充然便忘餐傲睨空千古大地一彈丸
結交三十年臭味無甘酸曩歲投有北愍我行路難
衰年作遠別意氣猶不刊三載始南還公已俶歸鞍
悵然心不怡寄書問平安今年卜後期謂言度春寒
春徂夏將半消息斷尺竿采石忽騎鯨緱山杳驂鸞
後生將安放良朋况永嘆積雨滿江海天南路脩曼
緬想楓林魂莫薦荔子丹男兒恨長在友道缺不完

馬笛空自悲牙絃不復彈蕭瑟江山掩然疑斗牛蟠
人間留迹作磊奇定不刊哀歌不成曲臨風涕自沈

哀月巖李叅奉

匡呂

夫子何爲者知者蓋鮮矣國人誦公詩詩非公所喜
學者慕公名名亦公所耻世儒尚口耳公則比糠粃
夸夫愛軒裳公乃視泥滓內全赤子心外貞幽人履
博觀淹丘索妙契析名理有時發希音天球曩雲起
獨立人間世超然遊太始瑩如淵中珠清澈無表裏
矯如松間鶴偃蹇絕扳倚古人不復見強名謂高士
其來不可偶其去不可止我歌誰爲爲哀蟬鳴不已

東方日出鄉靈氣所亭毓粵自羅麗際才傑頗磊落
我朝掃荒屯文運乃大闢笙鏞變嘈哇絃誦化縫掖
髦俊斐然興馳騫競華國居而攻翰墨進則鳴館閣
其弊文拚質藻綵事雕飾寥寥百年間無人執繩尺
東臯倡古文門戶肇廣拓谿農接跡起制作遂彬郁
文軌得範驅上滂韓歐脉後生習摸擬流波漸卑弱
芝川發源大文瀾倒華岳縱橫泛左馬峻潔咀公穀
網羅百氏英折衷八家則抵掌劈龍門衆流爭歸壑
提挈南趙輩旗鼓抗高壁叱吒生雲蜺千人皆辟易

哀江漢黃太史

景源

十載尸詞盟四方傳述作 聖人御休明奎章貯羣
玉首延宮賓舊顧問待鴻碩潤色摸雲漢聲烈被金
石高年列耆社崇秩並槐棘惠養禮數備月致有粟
肉花輒履聲高皓髮立如鵠而我晚進也文契猥見
托朽木視良材大匠勞斤斲有時肩輿訪傾倒窮丘
索傲視千載空片言卽然諾蕪辭輒就正鉛朱爛盈
矚芻蕘亦有擇雌黃敢點摘忘形許知音聯翩飛尺
牘謂言樂莫樂後人堪歎息一夕夢公至論文竟膝
席勗我損有餘研磨進格力文章貴簡嚴旣博斯可
約歷歷言在耳樑月照窓白是時聞公疾儻然心內

王漢集 卷九
愕天明趣駕往微息方寄簣三呼便開睫如喜復如
憾喉中作數語藹然見情曲舉手使之拊開口聲不
續出戶便長辭我淚欲暗滴精誠感宵寐神交聞古
昔死別知有贈至言良可服文星忽斂彩江山氣漶
廓獨留人間世白首猶秉燭流水有斷絃長空唳孤
鶴春風動清湍雲車飛邈邈千秋江漢集空有子雲
讀

哀良翁李京尹

獻慶

昔我投北荒公則守青州邂逅咸關城同登樂民樓
山河撫王跡盃酒豁羈愁讀我鐵嶺詞擊節嘆壯遊

分手又千里魂夢兩悠悠三載俱南還風雅迭唱酬
我車方西騁公乃領蓬丘縱觀中華大深探造化幽
篇章爛盈筍瓊瓜互相投布鼓當雷門瓦缶應鳴瓊
百韻希菴誅波瀾倒銀湫沉雄杜黃調清越沈宋流
古文亦爾雅上與莊馬謀公素喜爾雅名其軒托余書扁故云倡言關
西學深爲吾道憂余赴燕時贈序極言西學之盛於中國將有漸染吾東之憂故云
鴻匠握繩斧下里掃哇啾軒組視浮雲晚節遭逢優
班聯齒卿月廊廟贊謨猷鑿輿謁 仙寢清漢舟梁
浮公時職司農獻議叅可不 王曰汝作頌穆如吉
甫儔 重宸垂華袞四方傳歌謳屬余識其尾續貂

良可羞追隨數十載同聲自相求抵掌吐奇氣炯然
動清眸高才與雅操季世實寡仇雲鶴方孤翔風馬
不暫留生以文星降去與文星收公載夙時有星夢
故初名與表德以
此及沒時又有
星隕之異故云後生失指南文盟誰執牛伯牙絃空
斷山陽遂長休悵望一悲嘯知音俟千秋

哀芝溪宋處士

載道

詩道出大勺人籟參化工希音始巷謠雅響傳國風
浸淫逮後代元氣鑿鴻濛近體傷組織靡辭掩真衷
芝溪有逸士天機自冲融高步躡魏晉疏節抗羽宮
歌成白石爛興寄幽桂叢騎驢到京洛紫閣醉霜楓

白首晚結社佚宕聯郵筒汪洋震澤子卓犖小瀛翁
我昔居涖西君來自漢東龜疇訪殷師麟窟想朱蒙
揮筆劈鏡波江山與爭雄去歲涉幽燕一病臥山中
寂寥數句詩送遠何息息今春渡鴨水雲外聞哀鴻
嗇然放長嘯仰視天懵懵遼鶴空自返禹碑與誰窮
傲骨埋荒丘奇氣摩遠空衆竅紛嘈晰我耳從此聾

哀小瀛洪進士

秉哲

我於世寡偶晚得芝與瀛二子東方豪希音抱咸諛
紫閣環萬松詩壇抗崢嶸春花與秋菊琴樽縱復橫
冲和振大雅淵永叶正聲羣彥聞風趨聲名一代傾

耳溪集 卷九
追遊五六年文彩照洛城盛事終難久物理有虧盈
嗟君哭西河盡室于東征終南巷無人散落如晨星
去歲我適燕君來送遠行商歌鼓衰氣萬里視階庭
經年渡鴨水家國喜安寧忽得故人書芝翁已騎鯨
老齡失良朋悽然淚欲零惟餘一瀛在將見握手迎
歸來問消息君亦二豎嬰寄書勉寢飯後期示叮嚀
秋風病始蘇羸驂叩我扃歡然出門笑接膝舒離情
呼燭索燕詩高吟抵深更碣石風濤白薊門烟樹青
奇氣更激昂塵襟賴廓清抵掌擊麈尾掀髯倒兕觥
縱談及理數劈劃同建瓴範圍數千載皎如指掌明

顧我老鑽研斂手瞠然驚君詩出選騷逸韻動錡鏗
健筆如奔驥方祥誰敢撓胷海吞鯤鵬武庫森戈旌
惜哉才不遇濩落竟無成我亦將歸田相依度餘生
信宿仍分袂後會指流鶯二月春江渙東園木向榮
待君胡不來倏已駕雲駢得非歸瀛洲無乃朝玉京
嚴霜隕百花怪鳥自飛鳴君兮有達觀浩然齊殤彭
白首我獨存何爲漫沾纓臨風作悲歌漠漠竟誰聽

哀修井鄭尚書

景淳

惻惻復惻惻故人今來哭吞聲又吞聲聲斷不能續
昔我赴燕薊公時在枕席耆齡萬里別後會難可卜

王漢集 卷九
欵欵強言笑黯黯疚心曲經年始東還間關到鳳柵
家國喜平安知舊問消息有誰傳爛報人事劇遷易
公身已黃泉公名掛白牘愕然心內折仰視天漠漠
死生固常理網羅又何觸我亦罹文法域弩從暗射
屏身投江臯漁樵混野服經時復經歲名字斷朝籍
方春雷雨解簪履垂記憶深推玉汝恩復授金吾職
屢辭乃供職感激仍踧踖仲容稱良吏解紱由畏約
繡斧威稜重耽耽虎而翼文致十大罪囚首繫王獄
官名雖議讞爰書敢分析羅列百千言仰備 明主
擇墨批半夜降情實盡照燭亟命釋其罪因之及乃

叔恩言示嗟惜疑謗悉昭晰闔族競攢手朽骨還傳
肉容光及死灰和氣達陰谷行路尙感唏我心當何
抑回思少日契到此一吐臆幼余不自量昂然慕古
昔交遊盡豪俊於君最畏服青年交白戰雪庭呵凍
墨每出驚人句瞠然筆屢闕志操以礪俗文章足華
國利刃劈筋髓慧眼透金石我如爐中鐵君似櫝裏
玉爐鐵待鎔鍊櫝玉無追琢我同伏櫪蹄君如冲霄
翻伏櫪戀棧豆冲霄絕矰弋玄首至皓髮知心爾我
獨出處雖異塗臭味久無斃爵秩非自有年壽詎不
足朝野失老成後生安矜式深巷無吊客故宅餘喬

耳溪集 卷九
木長嘯俯一世大地空寥廓啼鳥多苦音浮雲無定
色昨夜夢覲君林間立瘦鶴相望不可親兩眼俱脉
脉悠悠千古志去去何人識臨江一瀉淚江水無終
極

哀震澤申承旨

光河

東韓有奇士自號曰震澤遨遊物之外棲心於淡泊
文章自瓌奇意氣何磊落疋馬三千里飄然上長白
濯纓天池水長嘯倚大角頰視皆蟻垤箕斗可手摘
臨風發豪唱餘音振山谷君名聒我耳君詩駭我目
邂逅清齋舍抵掌談永夕驚濤起舌端長虹出鼻息

於焉兩忘形傾倒絕皮膜芝溪與小瀛結社在紫閣
有花輒同賞有酒每相速曩余居涓上五馬自雪嶽
掀髯一揮毫旗鼓更無敵文亦好莊馬縱橫脫羈束
傲眼空一世兒曹笑碌碌嗟余老謝世無與共翰墨
驚喜出門迎此會那曾卜徵歌練光亭挈舟朝天石
春風吹華髮江月倒深杓醉帽從自落腰綬笑欲擲
男兒貴得意勝地成三宿俄爾解郡符倏然登桂籍
詩名動九重一歲屢遷擢翱翔省直清切銀臺席
我歸自燕都公來敲江郭把酒慰遠役開篋仍大讀
崔嵬萬里城感慨三河驛金輪湧遼野冰車躡太液

浮雲幾變滅正聲今寂寞激昂談千古曾襟廓蕩滌
我嘗論公詩汪汪魏晉脈急瀉三峽浪慢流千里曲
賴有二三子聊可代炳燭夫何數年來零落同秋栢
有唱誰我和有疑誰與析沁水傳舊詞梨園罷古笛
公新遞江都經歷且在樂院喜聽古笛故云層空一鶴舉大海孤鵬擊長
歌送遠征雲車飛邈邈

百歲老人李知事 蝶八首

至治薰蒸五十春域中仁壽奠斯民始知元氣陶勻
盛養得昂藏百歲人

城市重來不記年八旬元老拜床前逢人問姓仍論

契盡是朋儕曾若玄 元老俞領相拓基

仙官扶掖上瑤除天語慇懃執手餘金帶紫袍映黃
髮闔街士女擁歸車
眉長過頰耳垂頤秀骨癯形老鶴姿最是雙瞳光燁
燁當筵索筆寫唐詩

吾祖戊申以降生那知今日見同庚洛誦樓中傳盛
事孱孫聽罷淚沾纓 洛誦樓卽三淵金公詩樓也公言少時嘗從遊王考於此中

丈人無乃得天均何術長年養谷神不讀參同不服
藥清泉一碗吸清晨

青牛關外初傳道白傅圖中最大年公家自有神仙

耳溪集 卷九
譜千載三人可拍肩香山九老會李元來年一百三十六齒最高故第二句云
謫來塵世亦遐齡乘化真如一夢醒定知風馭歸天
上南極新添第幾星

鄭承旨聖從純儉 輓

詩酒風流一代豪妙年蓬閣握彤毫胷中氣格青霞蔚
醉後歌吟白雪高嶺海棲遑猶傲骨雲霄騰翥半兒
曹修文地下歸何恨留得琳琅繼楚騷

鄭驪州夏彥輓 四首

騷壇鼓吹掃千羣塵世軒裳視點雲最是胷中湖海
氣眼前諸子笑紛紛

詞宗墨妙兩兼之一代英豪並轡馳先輩十年零落
盡流風餘韻更憑誰

公住墻東我巷西芳樽日夕每招携淒涼故宅空花
落惟有山禽伴客啼

清心樓上把盃迎青眼華顛見故情醉席高吟如昨
日那知一別便吞聲

李進士敦恒 輓

昔我年方壯五馬遊東京魯衛多君子絃歌滿武城
子以庠士俊年與我同庚先賢有典刑眉眼秀而清
揖讓樽俎會淋漓翰墨評聯武崔南輩鼓吹動新聲

春風鳳臺笛秋月玉山觥
文彩照江左風聲起後生
回首二十年流光去崢嶸
我已雙鬢改君又二豎嬰
去歲尺素來欸欸見故情
鴈翻未言旋風馬已退征
嶺雲空漠漠林鳥漫嚶嚶
淒涼普門路蕪沒草樹縈
觀魚留舊磯讀書餘短檠
鬱鬱青霞氣濩落竟無成
馬羣猶不空驥子已先鳴
悲歌違相紉老淚自霑纓

李察訪

榮鳳輓 三首

白髮飄零老督郵十年飢臥古楊州
詞場佚蕩風流盡時向村翁說舊遊

形癯神淨貌如心浮世塵埃不到襟
種樹課兒聊卒

歲悠悠末路少知音

梅鶴堂中一笑迎元宵月下把深觥
雲車不待清秋約惟有哀蟬滿樹鳴

李獻納潤甫輓

四首

曹溪石上一相逢葛屨蕭然倚古松
不問已知吾潤甫青霞十丈忽生曾

君房癡與次公狂浮世遨遊却善藏
時向俗曹聊小戲掌中能畫一阿房

七年饑臥海之濱叢桂巖阿不復春
男兒等死君何恨堪愧當時肉食人

五溪集 卷九
青山漠漠水茫茫一笛西風涕淚長何處白雲埋傲骨獨留明月照詩腸

活山南叅奉

龍萬輓

鷄林古徐羅山川秀而靈金鰲積蜿蟺紫玉抗崢嶸
精氣所孕毓磊落出豪英文獻冠東南絃誦有餘聲
昔我尹茲土風謠訪舊京詩書有淵源衿佩盈庠黌
豈不斐然盛繩斧乃作成活山有處士高蹈葆幽貞
學綆窮百氏腹笥貯五經招延入禮羅多士得模型
遠滂皇王法深探孔周情德藝兼本末文史待權衡
春風德谿上翩翩聚冠纓文壇設鼎彝武庫森戈旌

蛾述又烏習鏘然聞善鳴我歸今廿載餘韻尙鉉鏗
辟書下天門素志固巖扃鳳毛亦成章龍門已策名
年高望彌重養全祿仍并篇章迭往來千里如對評
去歲求我文緘書托兩生書去公已病餘恨結幽明
烏啼上書林雲暗半月城村童誦遺句講席留餘馨
緬懷疇昔遊操毫涕自橫風馬歸何處應尋覽輝亭

族弟九臯處士士良

儒浩輓

吾祖起詩禮傳家有軌度君以末之裔嶄然能自樹
質行根孝友悃悞敦舊故博學淹子史研經貫箋註
早有遺世志偃蹇脫羈鼻携家海之溼混跡於農圃

王溪集 卷九
我縮洪陽紱疋馬造君寓弊衣出柴門握手見情素
縱談窮圖誌微言析理數馳騁涉無際我實僵且仆
有時亦妙契相對不言喻偃室屈澹臺陳榻延徐孺
從此托心期招邀或遠赴碧城清秋泛耳溪良夜晤
曩歲我北遷君亦走嶺路誅茅小白下山水佳可住
遺我當歸草示我閒居賦乞身貴及早莫待年遲暮
中心佩良規冥冥不可慕嶺雲遼且脩臨風但長滂
今春有王事我馬將南騫謂言飛尺書趣君理行屨
雲林與澗扉庶謀幾日聚征車未及脂有誰傳君訃
愕然遂失聲寸心折已屢十年離索久鬱結不復吐

此行良非偶化翁豈相妬冲襟與苦操衰季獨高步
聲名滿嶠左何有死韋布高山近九臯層霄想一羽
霓旌杳難攀行行首頻顧揮涕瀉哀詞泉臺照心腑

洪長城載汝

景厚輓

昔我遊翰墨志在辨雅俗子以後來秀昂然步繩尺
小瀛與芝溪並世詞林伯揮袂起風雨高壇屹紫閣
文酒發號令松篁韻鼓角少年吐奇音鏗鏘戛金玉
瀛翁哭西河芝老歸東谷子又佩郡紱散如晨星落
我車無停轍清淚與碣石回頭十年間萬事成寥廓
去歲菊有華我出耳溪曲君以疋馬從携酒觀層瀑

日短興猶餘更留今春約歸來月未易倏爾隨風燭
美桐初中絃翔鵠竟折翼舊社風流盡白首惟我獨
緬憶朱溪作光恠尙炫日短詞和淚題聊代山陽笛

耳溪集卷九 終



